



Hanatanteraka ny tetik'asa izay tafiditra ao anatin'ny vinan'ny Filoha ho fametrahana ny tanàna vaovao no andraikitra goavana izay ho sahanin'ny Minisitra Lefitra miandraikitra ny Tanàna vaovao sy ny Trano fonenana, Zasy Angelot.

Ny sabotsy 01 Febroary 2020 no notanterahana ny famindram-pahefana teo amin'ny Minisitra misahana ny Fanjariana ny tany, Hajo Andrianainarivelo sy ny tenany, tao Anosy. *“Ny fahaiza-manao ny sehatra tsy miankina no hoentina hanatanterahana ny tetikasa ny Tanàna vaovao sy Trano fonenana”*, hoy ny Minisitra lefitra Zasy Angelot.

Raha ny Tanàna vaovao dia efa heno matetika izany indrindra any ivelany. Tsy sarotra araka izany ny hanatanterahana azy eto Madagasikara, saingy mila fiaraha-miasa amin'ireo sehatra matihanina iraisam-pirenena. Ampifandraisina ihany amin'ny zava-misy eto amintsika izany, na ny lafin'ny sosiahy sy izay rehetra tokony ilaina mifanaraka amin'ny filàn'ny mponina toy ny jiro, ny rano, ny tsenà sy ny maro samihafa.

Na dia efa misy aza ny paik'ady efa mipetraka mahakasika ny Trano fonenana, dia mila ampifanarahana amin'ny faritra hanorenana izany ny tetikasa atao. Ny antony dia tsy hitovy ny ilaina amin'ny faritra hafa sy ny eto andrenivohitra, ohatra, ka ilaina fanadihadihana mialohan'ny fanatanterahana ny tetikasa, hoy ihany ny Minisitra Lefitra.

Taorian'ny famindram-pahefana dia nisy dinika manokana niarahan'ny Ministra Lefitra tamin'ireo teknisiana izay efa nametraka mialoha ny tetik'ady ho amin'ity vina Tanàna vaovao sy ny Trano fonenana ity, notarihan'ny Tale Jeneraly misahana ny tetik'asa ny fiadidian'ny Repoblika Augustin Andriamananoro.

Ity farany sy ny ekipany izay nitsodrano ny Minisitra Lefitra hahatontosa ny andraikitra napetrakin'ny Filohan'ny Repoblika aminy, vonona ihany koa izy ireo hifanome tàmàna amin'ny tetikasa fanoranana Tanàna vaovao sy Trano fonenana. Hatreto izany dia teknisiana ranoray ny Minisitra Lefitra Zasy Angelot, manana traikefa manokana momba toerana nametrahana azy. Midika izany fa tonga dia hanatanterana asa avy hatrany izy fa tsy handany andro anao kabary ambon'ny latabatra.

Andry Rakotonirainy